

Das Register.

1. Die Fazia des Hauses/ oder die vordere Seiten/ vnd wie dieselbige durch ein gar ringfertige nicht kostbare/ aber gleichwol ansehnliche Mahleren/ von Einfassungen der Fenstergericht/ Gesimbsen/ Item Thüren vnd Portalen/ nach Art der Architectur ist ornirt worden
2. Zu noch besserem Verstand aber/ so seynd hiezugegen fünf sonderbare Einfassungen zu den Zug: vnd andern in den Sibeln stehenden Läden/ vmb etwas ergrössert/ beneben so deutlich vnd wolmeinend vorgebildet worden/ daß auch verhoffentlich der geringste Mahler darnach zu mahlen gnugsame Instruction wird haben können
3. So seynd gleicherweiß sechs vnderchiedliche Manieren/ von Fenster Einfassungen/ auch zu dem Ende vergrössert/ beneben in sein verjüngten Maßstab/ also eingetheilt worden/ daß der Mahler auch gar ringfertig darnach laboriren/ vnd es ihme zu Nutzen wird dienen lassen.
4. Zu besagter Intention, seynd abermalen hier/ zwey halbe Fenster/ so wol auch ein dreyfaches Fenster/ beneben drey gemeine Thüren Einfassungen/ obgehörter massen ergrössert/ vnd solcher Gestalt vorgebildet worden/ daß der Mahler hierbey gute Nachrichtung haben kan.
5. Drey Einfassungen oder Bekleidungen der Hausthüren vnd Portalen/ abermalen ergrössert/ vnd so ausführlich auffgerissen/ daß es fernerer Umstand/ noch Beschreibung nicht vonnöthen haben wird.

Darmit so were nun sovil als die Mahleren betrifft/ der Sachen ein Benügen geschehen/ es wird aber der Architectus, mit disen einigen Zieraden oder Baudeckmantel/ noch nit contento oder zu friden seyn/ sonder vil mehr dahin/ wie dann das Werck selbst/ nemlich das innere Gebäu der Zimmer/ bey disem so Irregular Werck geformirt vnd außgetheilt worden seye/ nit vnbillich seine Gedancken werffen/ ihme nun auch den Willen zumachen/ so wird er auß hernach folgenden Kupfferblatten gnugsame Instruction zuvernemen haben.
6. Der Bodenriß/ oder der Platz/ warauff dann diser ganze Bau ist gesetzt worden/ der wird nun erstlich also in den Grund gelegt/ hernach aber calculirt, außgerechnet/ vnd in Erfahrung gebracht/ wie vil gevierdte Werckschuch dessen ganzer Inhalt seye.
7. Der erste Grundriß des Hauses/ hiezugegen dann die beede Eingänge/ sampt den Gewölbern/ Item die beede Haustennen/ dem Garten vnd Wasserwerck/ also im Grund da ligend/ zu sehen seynd.